

दिनांक 26.02.2025

समय: 18.45 बजे

- एशिया-प्रशांत हलका मांय 12वां क्षेत्रीय श्री आर और सर्कुलर इकोनॉमी फोरम री मेजबानी भारत ने- जयपुर मांय तीन मार्च ऊं सम्मेलन व्हेला।
- राजस्थान अध्यापक पात्रता परीक्षा काल ऊं-कुल तीन पारियां मांय व्हेवण वाळी रीट परीक्षा सारू व्यापक प्रबन्ध।
- दुनिया रो सब ऊं मोटो आध्यात्मिक अर सांस्कृतिक समागम महाकुम्भ आज पूरो व्हे रह्यो है -संगम माथे पवित्र स्नान सारू जातरूआं रो सैलाब।
- भगवान शिव री आराधना रा पर्व महाशिवरात्रि रे मौके प्रदेशभर मांय भक्ति रो माहौल।

000

भारत, एशिया-प्रशांत हलका मांय 12वां क्षेत्रीय श्री आर और सर्कुलर इकोनॉमी फोरम री मेजबानी कर रह्यो है। तीन दिन रो ओ सम्मेलन जयपुर मांय 3 मार्च ऊं सरू व्हेला। राजस्थान इन्टरनेशनल सेंटर मांय व्हेवण वाळा ई सम्मेलन मांय पांच सौ ऊं बत्ता प्रतिभागी सिरकत करेला। इण मांय थीम आधारित संगोष्ठियां, खास चर्चावां अर दूजा सत्र व्हेला। केन्द्रीय मंत्री मनोहर लाल रे मुजब ओ चालीस ऊं बत्ता कारोबारां अर स्टार्टअप री बेहतरनीन कार्य प्रणालियां अर समाधानां रो दरसाव करण सारू मंच मुहैया करावेला। फोरम मांय देशभर रा गैर सरकारी संगठनां अर खुद सेवक समूहां री ओर ऊं कचरा ऊं सम्पत्ति बणावण री पहल रो ई दरसाव कर्यो जावेला। वे कह्यो के सम्मेलन रे दौरान प्रतिभागियां ने ठोस अर तरल अवशिष्ट प्रबंधन तकनीक हलका रो दौरा ई करण रो मौको मिलेला।

000

लोकसभा अध्यक्ष ओम बिरला आज सिरोही जिला रा आबू रोड मांय प्रजापिता ब्रह्मकुमारी ईश्वरीय विश्वविद्यालय रा प्रकाशमणि विज्डम पार्क रा उद्घाटन जळसा मांय सिरकत कर रह्या है। इण ऊं पैली श्री बिरला रो स्वरूपगंज मांय जनता री ओर ऊं अभिनन्दन करी ज्यो। ई कार्यक्रम मांय राज्यमंत्री ओटाराम देवासी अर सांसद लुम्बाराम चौधरी ई मौजूद रह्या। ई मौके वे कह्यो के सिरोही आकांक्षी जिलो है। लोकसभा अध्यक्ष कह्यो के सरकार ई हलका रो समावेशी विकास तैय करण अर जनता री जिन्दगी बेहतर बणावण सारू लगातार कोशिश कर रही है।

000

मुख्यमंत्री भजनलाल शर्मा महात्मा ज्योतिबा फुले मंडी श्रमिक कल्याण योजना रा तैत विवाह सहायता राशि मांय बढोतरी री मंजूरी दे दीनी है। हाल ही बजट मांय करी ज्या ऐलाण रे मुजब ई योजना रा तैत अब लाइसेंसधारी मजूरां री बेटियां रा ब्याह रे मौके दी जावण वाळी रकम 25 हजार रुप्या बधा र दो बेटियां रा ब्याह मांय 75-75 हजार रुप्या कर दीरीजी है। मुख्यमंत्री हनुमानगढ़ टाउन कृषि उपज मंडी मांय नुवा निर्माण कामां सारू आठ करोड़ 47 लाख रुप्या री मंजूरी ई जारी कीनी है।

ई रकम ऊं मंडी यार्ड मांय कवरिंग शेड बणावण अर फलड लाइट्स अर सी.सी.टी.वी कैमरा लगावण रा काम कर्या जा सकेला। ई सागे ई किसानां अर मजूरां रा आराम सारू विश्राम घर ई बणायो जावेला।

000

राजस्थान अध्यापक पात्रता परीक्षा 2024-रीट काल सरू व्हेला। 28 फरवरी ताई ली जावण वाळी ई परीक्षा सारू 41 जिलां मांय एक हजार 731 केन्द्र बणायी ज्या है। राजस्थान माध्यमिक शिक्षा बोर्ड री ओर ऊं ली जावण वाळी आ परीक्षा देवण सारू 14 लाख 29 हजार ऊं बत्ता परीक्षार्थी नाम मण्डाया है। फर्जी उम्मीदवारां माथे रोक लगावण सारू पहली दफा चेहरा रे जरिये पिछाण री तकनीक काम ली जावेला। ई सागे ई उम्मीदवारां री आंगळियां री छाप ई ली जावेला। परीक्षा केन्द्रां माथे सीसीटीवी कैमरां रे जरिये निगराणी राख्खी जावेला। रीट परीक्षा देवण वाळा उम्मीदवारां ने आवण-जावण सारू रोड़वेज री बसां मांय मुफ्त सफ़र रो सुबीतो दियो जावेला जद के उत्तर-पश्चिम रेलवे री ओर ऊं ई खास गाड़िया चलायी ज्यी है।

राजस्थान कर्मचारी चयन बोर्ड की ओर ऊं ड्राईवर रा 2 हजार 759 ओहदां माथे भर्ती सारू अर्जियां काल ऊं 28 मार्च ताई दी जा सकेला। भर्ती सारू बोर्ड की ओर ऊं ई साल नवम्बर महीना मांय परीक्षा ली जावेला। लाइब्रेरियन रा 548 ओहदा माथे भर्ती सारू ई अर्जियां 5 मार्च ऊं दी जा सकेला।

000

एग्रीस्टेक योजना रा तहत प्रदेश मांय लगाया जा रह्या शिविरां मांय किसानां की ग्यारह अंकां वाळी विशिष्ट फार्मर आईडी बणायी जा रही है। ई यूनिक डिजिटल पहचान मांय किसानां रा सगळा भूमि खसरां की जाणकारी दर्ज करी जा रही है। इण ई कड़ी मांय बारां रा जिला कलेक्टर रोहिताश्व तोमर आज फार्मर रजिस्ट्री शिविरां रो दौरा कीनो। वे अटरू उपखण्ड रा अंता अर चरडाना गांवां मांय लगायी ज्या शिविरां रो जायजो लीनो।

000

प्रयागराज मांय 14 जनवरी ऊं चाल रह्यो दुनिया रो सब ऊं मोटो आध्यात्मिक अर सांस्कृतिक समागम महाकुंभ आज महाशिवरात्रि रा पावन पर्व रे मौके पूरो व्हे रह्यो है। ई मौके संवारे ऊं ई मोटी तादाद मांय जातरू संगम अर दूजा घाटां माथे डुबकी लगा रह्या है। महाकुंभ मांय हाल ताई 65 करोड़ ऊं बत्ता जातरू पवित्र स्नान कर लीनो है। महाकुम्भ मांय सिरकत करण सारू जावण वाळा जातरूआं की सुबीता बाबत् और बसां चलाई जा रही है। रेलवे आज संवारे नौ बज्यां ताई प्रयागराज रा न्यारा-न्यारा टेशनां ऊं एक सौ पन्द्रह गाड़ियां चलाई। आज प्रयागराज ऊं साढे तीन सौ रेलगाड़ियां और चलायी जा रही है। ई मौके प्रसार भारती बोर्ड रा अध्यक्ष नवनीत सहगल कह्यो है के आकाशवाणी हमेशा लोगां ने देश की संस्कृति ऊं जोड़बा मांय खास काम कीनो है। महाकुंभ रा आखिरी दिन वां रा संदेश मांय श्री सहगल कह्यो के प्रसारण मांय आकाशवाणी रो कुंभवाणी चैनल लोगां माथे घणो असर कीनो। प्रसार भारती रा मुख्य कार्यकारी अधिकारी गौरव द्विवेदी कह्यो के आकाशवाणी कुंभवाणी रा तैत कुंभ ऊं जुड़ी खबरां , इन्टरव्यू अर खास कार्यक्रम दे र लोक सेवा प्रसारक रा तौर ऊं बेहतरीन काम कीनो। आकाशवाणी की महानिदेशक प्रज्ञा पालीवाल गौड़ कम बगत मांय मोटी तादाद मांय जातरूआं ताई पूगण मांय कुंभवाणी की कामयाबी की साराहणा कीनी।

000

भगवान शिव की आराधना रो पर्व महाशिवरात्रि आज पूरा प्रदेश मांय सिरधाभाव सागे मनायो जा रह्यो है। ई मौके खास मंदिरां अर शिवालयों मांय महादेव दरबार अर शिव-पार्वती की झांकियां सजाई ज्यी है। मंदिरां मांय संवारे ऊं ई जलाभिषेक समेत न्यारा-न्यारा धार्मिक अनुष्ठान कर्या जा रह्या है। महाशिवरात्रि रे मौके आज पाली मांय महादेव की शोभायात्रा निकाली जा रही है जद के जिला रा रोहट मांय संवारे जुलूस निकाली ज्यो। चूरू अर पाली मांय ई शोभायात्रा निकाली ज्यी। सीकर जिला मांय फतेहपुर शेखावाटी रा बुधगिरि की मढी मांय शिव मेळो लगायी ज्यो है, जिन मांय मोटी तादाद मांय जातरू पूग रह्या है।

जैसलमेर मांय ई महाशिवरात्रि रे मौके उमाव बण्योड़ो है। म्हाणा सवाईमाधोपुर खबरनवीस बतायो के घुश्मेश्वर महादेव मंदिर समेत न्यारा-न्यारा शिव मंदिरां मांय दर्शन करण सारू जातरूआं की लेणा लाग्योड़ी है।

000

उदयपुर जिला रा कैलाशपुरी मांय एकलिंग जी रा मंदिर मांय दो दिन रो मेळो भर रह्यो है।

000

दुनिया मांय नामी चार धाम मांय ऊं एक केदारनाथ धाम रा कपाट ई साल 2 मई ऊं जातरूआं सारू खोल दिया जावेला। आज महाशिवरात्रि रे मौके ओ ऐलाण करी ज्यो। गंगोत्री अर यमुनोत्री धाम रा कपाट 30 अप्रैल ने आखा तीज रे दिन खुलेला। जातरूआं की हिफाजत सागे तीर्थ यात्रा सारू सरकार सगळा जरूरी इन्तजामात कर रही है।

000

गुलाबी शहर जयपुर भारतीय सिनेमा रा नामी आयोजन आईफा अवार्ड्स की मेजबानी करण ने जा रह्यो है। ई दफा आईफा रो सिल्वर जुबली समारोह व्हेला। ई सारू न्यारी-न्यारी श्रेणियां मांय नामांकन रो ऐलाण कर्यो जा चुक्यो है। पेश है एक रपट—